

Noticia
Transparente
di Gobierno

ISLA ONLINE

Diaranson 17 Januari 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



Gabinete Wever-Croes



PROME MINISTER A REUNI CU MINISTER DI PROTECCION HURIDICO NA HULANDA, SEÑOR FRANC WEERWIND



Diamars merdia, Prome Minister Evelyn Wever-Croes a reuni cu Minister di Proteccion Huridico na Hulanda, señor Franc Weerwind. Señor Weerwind a bishita Aruba, y lo sigui pa Corsou pa atende e Justitiele Vierlanden Overleg entre Aruba, Corsou, Sint Maarten y Hulanda.

Prome Minister a expresa cu e reunion tabata uno positivo, na unda señor Weerwind a duna un "update" di e ultimo

desaroyonan riba e tereno di cooperacion entre Aruba y Hulanda, riba e proyectonan cu Hulanda ta trahando riba dje, y a intercambia idea riba e desaroyonan cu tin actualmente na Hulanda.

Por ultimo, Prome Minister a tuma e oportunidad pa duna señor Weerwind informacion riba con fuerte Aruba ta recuperando despues di e pandemia, y unda ta e areanan cu mester enfoca mas riba dje. ■■■

Prome Minister Evelyn Wever-Croes:

Despues cu lidernan di algun pais a urgi congreso pa respeta e voz di e pueblo

PRESIDENTE ARÉVALO A HURAMENTA DEMOCRATICAMENTE COMO PRESIDENTE DI GUATEMALA

“Ocacionnan asina ta pone bo realiza con fragil democracia ta den algun pais y ta pone bo sinti mas gratitud ainda pa e estabilidad y bendicionnan cu nos tin na Aruba”



E fin di siman cu a pasa, Prome Minister Evelyn Wever-Croes tawata na Guatemala pa e traspaso di mando di Presidente saliente senior Alejandro Giammanttei pa señor Bernardo Arévalo. Prome Minister a expresa cu esaki tawata un honor grandi pa por a participa pa representa Aruba y Reino na un ocasion asina importante.

Sinembargo, Prome Minister a remarca, e ceremonianan no a bay sin problema. Ciertu momento tawata tin hasta resistencia di parti di Congreso di Guatemala pa huramenta e Presidente nobo. Na e momento aki, algun lider, presidentenan di paisnan a yama un reunion di urgencia. Prome Minister hunto cu Presidente di Costa Rica, señor Rodrigo Chaves Robles, Presidente di Paraguay, señor Santiago Peña, Minister Presidente di Belize, señor Johnny Briceño varios canciyer, Presidente di Organization of American States (OAS), señor Luis Almagro y tambe representante di Union Europeo, señor Josep Borrell, a emiti un declaracion den cua nan a urgi Congreso pa respeta e voz di e pueblo di Guatemala, cu pa mas di 60% a vota pa Presidente Arévalo na augustus ultimo y pa laga su huramentacion tuma luga.

Despues di un atraso di 9 ora, democracia a prevalence y e ceremonia di huramentacion di Guatemala su presidente nobo Bernardo Arévalo y vice presidente nobo Karin Herrera a tuma luga den oranan di marduga. “Di parti di Aruba y di parti di Reino Hulandes, mi ta felicita nan y desea nan hopi exito. Tambe mi ta felicita pueblo di Guatemala cu nan Presidente nobo”, Prome Minister a expresa.



Presidente Arévalo tawata tin un programa hopi ambisioso basa riba combati corrupcion y respeta derecho humano. Gobierno di Aruba ta sostiene esaki y Prome Minister durante su combersacion cu Presidente Arévalo a indica tambe na e presidente cu e por conta cu e sosten di Aruba y di henter Reino Hulandes den esaki.

“Momentonan asina, ta momentonan grandi pa representa Aruba. Ora cu presencia tur loke cu ta wordo haci pa stroba un presidente elegi democraticamente pa su pueblo tuma mando, ta pone bo realiza con fragil democracia ta den algun pais den nos region. Pero tambe ta pone bo sinti mas gratitud ainda pa e estabilidad y bendicionnan cu nos tin na Aruba”, Prome Minister Evelyn Wever-Croes a expresa. ■■■



MINISTER XIOMARA MADURO TA INVITA PA SINTONISA UN PROGRAMA INFORMATIVO INTERESANTE DIGITALISACION NA DEPARTAMENTO DI IMPUESTO (DIMP)

Minister Xiomara Maduro ta continua cu programanan informativo na television. E biaha aki ta presenta un programa tocante 'Digitalisacion na Departamento di Impuesto (DIMP)'. E mandatario ta informa cu e proyecto di digitalisacion na DIMP a cuminsa na aña 2017 pa mehora e servicio na e contribuyentenan. Durante e añanan cu a sigui DIMP a introduci varios cambio atraves di e sistema online cu ta simpel y moderno pa facilita e contribuyentenan, pa e proceso por cana mas structura y lihe. E trabounan di digitalisacion ta un proceso intensivo y exitoso.

Den e programa aki Directora di Impuesto, sra Luenne Gomez-Pieters ta brinda informacion tocante e trayecto di digitalisacion na DIMP y lo duna tambe un bista di otro trabounan cu DIMP ta haciendo pa mehora e servicio na e contribuyente.

Minister Xiomara Maduro ta extende un invitacion na henter comunidad pa sintonisa e programa 'Digitalisacion na Departamento di Impuesto (DIMP)'.



E programa lo pasa diahuebs, dia 18 di januari pa 7.30 di anochi na Telaaruba y diabierna, dia 19 di januari pa 8'or di anochi na Diario TV. ■

MINISTER MADURO A CERA CONOCI CU IMF SU 'MISSION CHIEF' NOBO PA ARUBA E proximo evaluacion lo ta den aña 2025

E siman aki Minister Maduro di Finansa a cera conoci sr. Marco Arena kende ta e Mission Chief nobo di IMF, kende lo encabesa e team di Western Hemisphere cu cada dos aña ta haci nan evaluacion financiero y economico di Aruba den e 'Article IV Mission.'

E ultimo evaluacion di Aruba ta data di mei 2023 y e proximo evaluacion ta premira pa tuma lugar den e promer kwartal di 2025.

Minister Maduro ta yama sr. Arena bon bini y ta gradici e team di IMF pa e bon cooperacion y e trabounan cu nan a bin ta haci na bienestar di Aruba. ■



Minster Maduro di Cultura ta informa:

MANA TA HACI PREPARACION PA POR PRESENTA ARTE CONTEMPORANEO ARUBANO Y INTERNACIONAL



E Modern Art Gallery y Laboratorium di Museo Arkeologico Nacional di Aruba (MANA) ta conoce renobacion danki na fondonan di TPEF. MANA ta prepara asina pa por presenta arte contemporaneo Arubano y internacional.

Dialuna mainta Ministernan Maduro y Oduber den presencia di Directornan di MANA y Oficina di Monumento y representantenan di TPEF, a firma cu e compania Van Kessel cu lo percura pa e trabounan di renobacion. Esaki ta e di tres proyecto di mantencion cu fondonan TPEF ta cubri na MANA pa asina e museo por keda un luga bunita pa local y bishitante cera conoci cu nos herencia cultural. Importante ta cu e mantencion aki biaha ta encera tambe e edificio cu ta destina pa expone arte contemporaneo, un necesidad cu ta existi bou di nos artistanan local.

Minister Maduro ta gradici colega Minister Oduber, ehecutivonan di e fondo TPEF, Oficina di Monumento, Van Kessel y MANA pa e bon cooperacion pa haci e mantencion na MANA un biaha mas posibel na bienestar di Aruba su herencia cultural.





REUNION CU EMBAHADOR DI HULANDA Y CONSUL GENERAL DI HULANDA CU TA RESIDENCIA NA MERCA



Diaranzon mainta Minister di Turismo y Salud Publico sr. Dangui Oduber tawata tin un reunion pa asina conoce e embahador di Hulanda sra. Tarzelaar, cu ta residencia na Washington y tambe e Consul Generaal di Hulanda sra. Den Breems, cu ta residencia na Miami.

Un reunion unda a elabora ariba diferente topiconan manera; diversificacion di turismo, rutanen nobo di carga pa explora di Merca pa Aruba, shore power y posibilidadnan pa un colaboracion cu MD Anderson di cancer treatment institute.

Merca ta keda nos mercado di turismo mas grandi y ta importante pa mantene un bon comunicacion y relacion cu esnan cu ta representa nos pais Aruba den exterior pa asina nos sigui amplia nos conexion cu merca. ■■■





MINISTER GEOFFREY WEVER A NOMBRA PRESIDENTE Y SECRETARIS NOBO DI HUURCOMMISSIE



Ayera tabata tin un prome reunion entre e Minister di Asuntonan Economico, Sr. Geoffrey Wever, y e presidente nobo di Huurcommissie, Sra. Mr. Monica Kock y secretaris nobo di Huurcommissie Sra. Mr. Marlee Lacle.

Ya pa algun tempo Minister Wever a encamina e proceso cu ta enfoca riba profesionalisa y modernisa e Huurcommissie pa asina por brinda un miho servicio na comunidad. Aña pasa, un profielschets a ser estableci pa e miembronan y secretario di Huurcommissie, detayando e normanan di calidad y experticio cu cada miembro y secretario mester cumpli cu nan.

Despues di publica vacature pa varios puesto den Huurcommissie aña pasa y pasa proceso di seleccion, awo minister Wever tabata tin e placer di por presenta un presidente

nobo y un secretaris nobo.

Durante e reunion di ayera, a discuti varios topico relaciona cu mehoracionnan pa asina por agilisa e procesonan den Huurcommissie. E mehoracionnan aki ta inclui digitalisacion y optimalisacion di e procesonan necesario pa asina mehora e funcionamiento di Huurcommissie, no solamente pa proteha e derechonan di e huurdonan, pero tambe pa e verhuurders.

Minister Geoffrey Wever ta mira padilanti pa un periodo di bon trabou y mehoracion, y ta desea e Presidente y e Secretaris nobo di Huurcommissie tur clase di exito y tambe ta gradici e Presidente saliente Sr. Sommer y e Secretaris saliente Sr. Raymond Boekhoudt pa e trabow importante cu nan a ehrece pa Huurcommissie. ■■■

MINISTER GEOFFREY WEVER TA INTRODUCI E CONSTELACION NOBO DI E RAAD VAN COMMISSARISSEN DI POST ARUBA N.V.



Diaranson 17 januari, Minister di Asuntunan Economico, Comunicacion y Desaroyo Sostenibel, mr. Geoffrey Wever, a introduci e constelacion nobo di e Raad van Commissarissen (RvC) di Post Aruba N.V. E Raad van Commissarissen di Post Aruba N.V. nobo lo fungi den nan funcion desde 1 februari 2024 y ta consisti di e siguiente profesionalnan: señor Antonio Carlo (President-Commissaris), señor Jacques van der Scheer (Plaatsvervangend voorzitter), señor Edwin Tromp (Commissaris) y señor Henk Timmermans (Commissaris).

E constelacion nobo di Raad van Commissarissen di Post Aruba N.V. ta consisti di profesionalnan cu amplio experiencia. Señor Antonio Carlo ta un abogado cu experiencia extenso y tin su propio bufete y a fungi tambe como consehero legal pa diferente compania y gobierno y tin amplio experiencia como miembro di directiva. Señor Jacques van der Scheer ta traha den mundo di seguro y tin experiencia extenso den funcionamiento di businesses, organisacionnan y management. Señor Edwin Tromp tin experiencia amplio di mas di 48 aña den mundo di

banking and finance y tin experiencia tambe como miembro di directiva di diferente compania. Señor Henk Timmermans ta Register Accountant cu experiencia amplio den e area aki y den mundo di seguro, cu background den ley y experiencia como miembro di directivanan tambe.

Minister Geoffrey Wever ta gradici e Raad van Commissarissen di Post Aruba N.V. saliente: Señor Theo Kock, Señor Richenel Bello, Señor Henry Baarh y Señora Marline Pieters.

“Mi ta contento di introduci e constelacion nobo di Raad van Commissarissen di Post Aruba N.V. consistiendo di profesionalnan den area di ley, business, management, banking, finance y accounting y ta sigur cu nan lo haci un bon trabou den enfrenta e challenges y oportunidadnan di Post Aruba N.V.”, segun minister Geoffrey Wever, kende ta deseanan hopi exito y sabiduria den e trabounan cu tin nan dilanti y ta agradici cu nan a haci nan mes disponibel pa cu nan conocimiento haci un aporte positivo na Post Aruba N.V.”



DEN 2024 LO INSTALA LUZ LED ULTRAMODERNO NA DIFERENTE VELD DI FUTBOL, BASEBALL Y SOFTBALL ROND DI ARUBA



Recientemente, Minister Endy Croes a reuni cu presidente di Arubaanse Voetbal Bond (AVB) Sr. Randolph Lacle, unda a trata diferente tema di interes pa e deporte di futbol. Durante e encuentro, Minister Endy Croes a duna un avance di e proyecto di renobacion di Compleho Deportivo Guillermo Prospero Trinidad na Dakota. Ta planifica cu pa fin di luna di maart di e aña aki lo entrega e stadion bek. Minister Endy Croes a indica cu nan ta pendiente pa algun material cu mester yega di exterior, pero e ta bayendo riba bon caminda.

Tambe, a trata e certificacion di e veld. Manera ta conoci, tabatin un certificado temporario pa e weganan por a tuma luga. Den luna di januari, FIFA a duna e bon noticia cu e stadion ta oficialmente certifica y ta warda pa e documentacion yega Aruba. Ademá di esaki, a trata e fondonan cu FIFA

tin disponibel pa e desaroyo di futbol di Aruba, cual ta bay a traves di AVB y den colaboracion cu Gobierno di Aruba. Tin un proyecto caminda cu diferente miembro di futbol cu nan club lo haya yerbe artificial.

E proyecto aki ta tuma luga e aña aki. Durante e encuentro a trata e proyecto cu Gobierno di Aruba y Lotto pa Deporte, cual ta encera renobacion di tur luz LED ultramoderno di diferente veld di, entre otro, futbol, baseball y softball. Mandatario di Deporte a informa presidente di AVB con leu ta cu e proyecto aki. E programa – y rapportnan ta riba mesa y programa ta riba mesa. Awo e companianan mester ofrece e calidad cu ta existi pa despues tuma un desicion y cuminsa cu e proyectonan aki. Nos por mira atras riba un bon reunion cu AVB, unda a brinda informacion actualisa y elabora riba diferente proyecto. ■

Minister Endy Croes: A TRATA ALGUN PUNTO ESENCIAL PA MEHORACION DI BIBLIOTECA NACIONAL NA SAN NICOLAS



Recientemente, Minister di Enseñansa y Deporte Endy Croes a reuni cu directora di Biblioteca Nacional Aruba (BNA) Sra. Astrid Britten, director di Dienst Openbare Werken Aruba (DOW) Sr. Marlon Croes y staf y Sindicato di Empleadonan Publico y Priva Aruba (SEPPA) pa dialoga specificamente riba Biblioteca Nacional na San Nicolas. Pa algun tempo caba, tin basta peticion riba algun punto cu no ta den condicion optimal na Biblioteca Nacional na San Nicolas.

Pa e motibo aki, a reuni pa tur partido ta na altura kico ta e necesidadnan cu tin y pa tur hende ta riba mesun linea. A palabra cu DOW pa haci un evaluacion completo, primordialmente riba e puntonan aki, pero tambe riba otro aspectonan. E evaluacion aki lo tuma luga durante e prome kwartaal di e aña 2024, pues di awo pa maart lo tin e documento aki cu e costo pa inicia cu e restauracion. Unabes cu tin e documento riba mesa, lo bini bek hunto pa despues atende esaki cu demas coleganan minister y finalmente cu Departamento di Finanzas pa aloca fondo pa traha riba e aspectonan aki.

En berdad DOW ta hopi ocupa, haciendo diferente trabou, entre otro, evaluacion na tur scol di Aruba den cuadro cu Landspakket pa Minister di Enseñansa Endy Croes, pero a haci un compromiso cu nan lo inicia cu e evaluacion pronto na BNA San Nicolas. Unabes cu DOW ta cla cu e evaluacion y tin fondo disponibel lo por cuminsa planifica ki tempo precies lo inicia cu e restauracion di e puntonan cu ta rekeri di mas atencion na BNA San Nicolas. Pa finalisa, Minister Endy Croes a indica cu e tabata un bon reunion, unda a haci diferente palabracion concreto pa mehora algun aspecto importante na Biblioteca Nacional na San Nicolas. ■



Prome Minister Evelyn Wever-Croes:

SINDICATONAN MES TA TARDANDO E DELIBERACIONNAN DI INDEXERING

Sindicatonan ta tardando deliberacionnan di indexering. Ya desde 25 di October, 2023, Gobierno di Aruba, por medio di Minister President Evelyn Wever-Croes a invita sindicatonan SEPPA, SPA, SADA, TOPA, SIMAR, y FTA pa forma un comision pa traha riba indexering. Esaki a base di palabracionnan cu a haci entre Gobierno di Aruba y Sindicatonan ya na November aña 2019. Despues di e fecha aki, e comision no por a cuminsa traha pa motibo cu e pandemia mundial Covid a bati na nos porta y e prioridadnan a bira diferente.

Sinembargo na October di aña pasa, Minister President a pidi sindicatonan pa retoma e tema aki y ehecuta e decreto cu a wordo traha na aña 2019 y pa hunto traha riba un solucion structural di indexering.

Prome Minister a enfatisa cu Gabinete Wever-Cries kier soluciona e discucion riba indexering una vez por todas. Pasobra sindicatonan, manera ta conoci, cada tanto tempo ta subi caya pa existi indexering, Esaki, segun Prome Minister, no mester ta asina. Tin costo di bida cu a aumenta y Gobierno di Aruba asina tin pa compensa su trahadonan.

Pero ta importante, Prome Minister ta enfatisa, pa yega na un formula con pa adresa esaki unabes y pa semper. Pa e motibo aki tambe, Gobierno a institui un comision consistiendo di expertonan di Gobierno y sindicatonan, pa asina hunto bin cu un proposicion con pa atende e tema di indexering sin cu sindicatonan bay den accion cada biaha pa motibo di indexering.

“Lamentabelmente, sindicatonan no a duna oido na e invitacion aki di Gobierno desde 3 luna pasa y ainda sindicatonan no a indica kendenan lo representa sindicatonan den e comision.

Mientrastanto, Prome Minister a invita sindicatonan pa un reunion pa mira kico

ta e problema di traha den comision y lo aclarea esaki durante di reunion. Importante ta, Prome Minister a enfatisa, cu como doño di trabou, Gobierno ta carga su responsabilidad y kier haci esaki en conhunto cu Sindicatonan. Gobierno di Aruba ta spera cu sindicatonan bin na mesa pa papia tocante indexering y con pa regla esaki una bes por todas pa asina tin tranquilidad y seguridad pa tur trahado den e aparato gubernamental.



L.G.Smith Blvd. 76
Oranjestad, Aruba
Tel. (297) 528 4900

Na Directiva di Sindicatonan:
SEPPA
SPA
SADA
TOPA
SIMAR
FTA
Presente

Kenmerk: MAZ 4747

Oranjestad, 26 October 2023

Re: peticion pa reunion


Apreciabel lidernan sindical,

Pa medio di es carta aki mi ta confirma di ricibi e peticion di sindicatonan pa trata e topico di: indexering 2018, indexering 2019 - 2023 y bilateraal akkoord 2014 (indexeringsoverleg).

Manera ta conoci, conforme Decreto Ministerial di 15 november 2019, DWJZ/ No. 923/19 a wordo institui un comision tecnico pa dialoga y conseha gobierno riba e puntonan ariba menciona. Ricibi adhunto kopia di e decreto aki. Debi na e pandemia mundial Covid-19, no por a continua cu e tareanan.

Gobierno ta reconoce e esfuerso di sindicatonan pa continua e discucion pa cu indexering y pa trata e puntonan menciona. Pa es motibo ta informa cu e intencion ta pa continua cu e comision institui na anja 2019, y den cuadro di esaki mi ta pidi sindicatonan pa informa gobierno e nomber di e representante di cada sindicato cu lo forma parti na e dialogo aki, pa asina planea e reunion lo antes posibel.

Un cordial saludo,


Mr. E.C. Wever-Croes
Minister President
Ministro di Asuntonan General

2024

AÑA DI STABILIDAD Y PROSPERIDAD



Gabinete Wever-Croes

Ora nos cana den cayanan di San Nicolas cu ta dorna cu artenan mahestraal aki, nos ta realisa cu bunitesa por wordo haya den luganan menos spera. Arte di muraya ta e language visual cu ta conecta culturanan, na unda cu por aprecia historia, color, fantasia y dedicacion.

